



# Dipoo di a Itefeletša



**Mpho Motlhodiemang**



“Thušang! Thušang! Dipoo di a ntlhasela.  
Batho thušang hle!” Go goeletša Moopedi ka  
lešata le legolo.





Maano ke monna wa morui. O na le dikgomo  
tše dintši. Mo gare ga tšona go na le dipoo  
tše pedi tše dikgolo.



Maano o diriša dipoo tša gagwe go rwalela batho dikgong kua nageng. Maano o gobetše letolo. Ga a sa na maatla a go iša dikgomo mafulong le meetseng.





“Aga, ke tla bolela le Moopedi gore a tle go diša dikgomo tša ka”, gwa realo Maano. A boledišana le Moopedi, ba dumelelana.



Letšatši ka letšatši Moopedi o be a iša dipoo nageng go ya go fula. E re mantšiboa a di iše nokeng. Moopedi o be a sa rate dikgomo tše, kudukudu dipoo.





Moopedi o be a hlakiša dipoo. O be a sega a  
be a pitikame ge di phema kotsi. Ge di wela  
ka meetseng o be a sa di thuše. O be a dira  
ka boomo.



Ge dikgomo di boela gae, Moopedi o be a tia  
dipoo gore di kitime. O be a di tia ka maatla.  
Dipoo di be di hlaka. Moopedi o be a na le  
pelo e mpe e le ruri.







Ge Moopedi a fetša go hlahlela dipoo ka mo lešakeng, o di fa furu. Ge a fetša a tswalela kgorwana ka dikota, a sepela.



Maano o ile a roma Moopedi go yo rwala dikgong. Moopedi a pana dipoo a goga karikana.





Moopedi a rwalela dikgong tša tlala karikana go feta tekano. Dipoo tša leka ka maatla go goga karikana. Moopedi a thoma go di tia gore di kitime. Letšatši leo dipoo tša ngangabala. Di be di imelwa ke morwalo.



Moopedi o ile a galefa, a omanyā dipoo. A  
bolela ge di tšwafa ebile di dira ka boomo.  
Moopedi o be a se na taba le gore dipoo ga  
di a fula. Dipoo di be di se na maatla. Dipoo  
di be di se tša nwa le meetse.





Ge a goroga gae Moopedi a panolla dipoo.  
A di hlahlela ka lešakeng bjalo ka mehleng.  
A se ke a di fepa. A tswalela kgorwana ka  
dikota. Moopedi a leba gae.



Moopedi o rile ge a furaleta lešaka, dipoo tša hlahlamola kgorwana. Dikota tša wela kua. Dipoo tša mo hlasela. Gwa thunya lerole, maswika a šwalalana.





“Thušang! Thušang!” Moopedi a kitima  
a goelesa. Dipoo di mo lebile. A potela ka  
lerope la kgaufsi le tsela. Dipoo tša mo šala  
morago. Di mo logetše maano dipoo.



Moopedi a gopola go boela go Maano wa morui. Dipoo tša mo šala morago. Moopedi a kitima a lebeletše morago. A wela ka leopeng. A bona dipoo di mo lebile.







Dipoo tša feta, Moopedi a tsoga a kitima  
ka lebelo la mmutla. O tla ya kae Moopedi?  
A tlelwa ke leano. A kgopela baagišani go  
gapela dikgomo ka lešakeng.



Moopedi a lemoga gore dipoo ga di rate ka moo a di hlakišago ka gona. Naa o tla dira eng? Moopedi a tšea boleke a ga meetse. Ka boiketlo a nanabela a iša meetse lešakeng. A iša le furu. Dipoo tša thoma go ja, tša khora.





Moopedi a ema kgorwaneng a bolela le dipoo ka boleta le boikokobetšo. Go tloga letšatši leo, Moopedi a thoma go phela le dipoo gabotse.



Moopedi a tsenela dithuto tša go hlokomela diphoofolo. A ithuta tše dintši ka ga dikgomo.

Lerato la go šireletša diphoofolo la gola mo go yena. A thoma mokgatlo wa go šireletša diphoofolo. A eletša badiša ka moo diphoofolo di hlokomelwago ka gona.

